



UPA 2026/36

28/4-2026

Margrethe Thårup Andersen

**Uunga siunnersuut: Tusagassiorfinnut tapiissuteqartarneq pillugu Inatsisartut inatsisaata allanngortinnissaa pillugu Inatsisartut inatsisaat (Tusagassiuutilerisut digitaliusunut tapiissuteqartarneq)**  
(Ilinniartitaanermut, Kultureqarnermut Timersornermut Ilageeqarnermullu Naalakkersuisoq)  
(Siullermeerineq)

Naalakkersuisut siunnersuuteqarnerinut qujanaq.

Tusagassiorfiit kiffaanngissuseqartut, arlaannaannullu atassuteqanngitsut sumiluunniit ingerlalluartumik tamat oqartussaanerini tunngaviupput. Tusagassiorfiit aqqutigalugit innuttaasut paasisutissinneqartarput, pissaaneq unammillerneqartarpoq, ammasumillu oqaloqatigiinneq ingerlatiinnarneqartarluni. Nukittuunik tusagassiorfeqanngikkaanni isertuaatsuuneq, tatigineqarneq, tamallu oqartussaatillugit oqallinneq ajorseriassapput. Taamaattumik suliassaq tamanna tusagassiorfinnit naammassineqarsinnaatillugu sinaakkutinik qulakkeerinissatsinnut aamma akisussaaffeqarpugut.

Siunnersuutitigut matumuunakkut pingaarutilimmik, pisariaqartumillu tassunga alloriartoqarpoq. Inuiaqatigiinni tusagassiorarneq pappiaqqatigoorani digitaalikkooerneruleraluttuinnarluni inuiaqatigiinni ineriartornermut takusinnaariikkatsinnut malinnaalersillugu, tusagassiorfinnut tapiissuteqartarnerup nutarterneqarnissaa siunertaavoq.

Nutarterineq tamanna Demokraatit tapersorsorpaat. Pappiaranngorlugu saqqummiunneqarnissaanik piomasaaqatip peerneqarnissaa isumatusaarnerullunilu ullutsinnut naleqquppoq. Tamanna nutaaliornissamut periarfissiivoq, ingerlatsisunut nutaanut periarfissiilluarneruvoq, innuttaasullu atugariigaannut naapertuulluni. Ilutigisaanik tusagassiornerup assigiinngisitaarnerunissaanut tapertaasinnaavoq, taamaalillunilu tamat oqartussaaqataanerini oqallinneq nukittorsarlugu.

Taamaakkaluartoq aqqissuisunut piomasaaqat pillugu isumaqarpugut oqimaaqatigiissitilluarnerusoqartariaqartoq. Demokraatit kissaatigineruaat, piomasaaqat ukiumut sulinernut pingasunut inissinnagu, marlunnut inissinneqassasoq. Piginnaasat pitsaassuserlu taamatulli suli qulakkeerneqassapput, ilutigisaanilli pimoorussillutik ingerlatsisut amerlanerusut tusagassiiarnermi peqataanissaannut periarfissiissalluni. Tassani tusarniaaffigineqartut arlallit isumaqatigaagut. Sulisitsisut, Inuit Pisinnaatitaaffiinut Siunnersuisoqatigiit aamma MIO, Transparency International Greenland, Kommuneqarfik Sermersooq kiisalu Kalaallit Nunaanni Tusagassiorlut Peqatigiiffiat aamma Dansk Journalistforbundip tamarmik oqaatigaat, ukiumut sulinernut marlunnut appaaneq naleqquttoq. Taakkunanimi arlaqartut erseqqissaatigaat, tusagassiorfiit nutaat ammaananeqarsinnaasut, pitsaassuserlu akiginngikkaluarlugu assigiinngisitaarneq nukittorsarneqarsinnaasoq.



Isumarput malillugu tamanna pingaaruteqarpoq. Pitsaassutsimut, akisussaassuseqartumillu tusagassiornissamut piumasaqaasiussaagut, kisianni ineriartortitsinissaq aamma nutaannguinnissaq mattullugit malittarisassiuussissanngilagut.

Ataatsimut isigalugu Demokraatit siunnersuummut isumalluarput. Kiffaanngissuseqartumik tusagassiorninnaanissamut sinaakkutit annertusivai, inatsit digitaalinnngornermut naapertuutissaaq, tugassiornerullu ammanerulernissaanut aamma eqaannerulernissaanut tapertaassalluni.

Taamaakkaluartoq ataatsimiititaliami oqaluuserineqarnissaani, aqqissuisut ukiumut sulinerat marlunnut apparneqassanersoq erseqqissummik misissorneqartariaqarpoq. Tamanna Demokraatinit innersuussutigiumavarput.

Taamatut oqaaseqarlunga siunnersuut Kultureqarnermut, Ilinniartitaanermut Ilisimatusarnermut Ilageeqarnermullu Ataatsimiititaliamut innersuussutigiarput.